



4. august 2020

UKA2020/118

Inatsisartut Suleriaasianni § 33 naapertorlugu matumuuna aalajangiiffigisassatut siunnersuut manna saqqummiuppara:

Utoqqalinersiaqarneq pillugu Inatsisartut inatsisaannik nr. 20, 23. november 2015-meersumik UPA2021-imut allangortitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni pisortanit utoqqalinersianik pisartagaqarsinnaaneq 66-inik ukioqalernermit pisussanngorlugu allangortinneqarluni.

(Partii Naleqqap Inatsisartunut ilaasortaaitai)

Tunngavilersuut:

Utoqqalinermit soraarnerussutissiat pillugit qujanartumik Inatsisartuni ukiuni kingullerni annertuunik oqallittarsimavugut, peqatigitillugulu annikkaluani naleqqussaasarsimalluta. 2015-imi Inatsisartut ukiakkut ataatsimiinneranni utoqqalinermit soraarnerussutissiat pillugit Inatsisartut inatsisaat suliarineqarpoq, tamatumunngalu peqatigitillugu utoqqalinermit soraarnerussutissiaqalersinnaanermut ukiussarititat aamma aalajangersarneqarlutik, 2021-imiit 67-inut qaffanneqartussanngorlutik, oqaatigineqartutut nunatsinni arnat angutillu siviruserussutissiat inuusarsimammata. Pissutsilli piviusut imaapput nunatsinni agguaqatigiissillugu qanoq sivirusutisumik inuusarneq Danmarkimi qanoq sivirusutisumik inuusarnermut sanilliukkaanni, taava nunatsinni agguaqatigiissillugu qanoq sivirusutisumik inuusarneq suli sivikinnerungaatsiarpoq.

Kalaallit Nunaat inuuffigissallugu peqqinnaraluarpoq. Nunatsinnili peqqissuseq ataatsimut isigalugu Danmarkimut qaffasitsiginngilaq. Tamatumunnga pissutaavoq ajornartorsiuterpasuarnik allanik qaangerniagassaqaratta: Ajunaarnerit, imigassaq, aannngajaarniutit, pujortartarneq, sumiginnaaneq, uippakajaarneq, sullivinni atukkat pitsaanngitsut, ineqarniarnikkut pissutsit pitsaanngitsut, inuuniarnikkut pissutsit pitsaanngitsut il.il.

Paasissutissat nassaarineqarsinnaasut nutaajunerpaat malillugit danskinit sivikinnerussutissiat inuusarpugut. Nunatsinni angutit agguaqatigiissillugu 69,4-nik ukioqalertarput arnallu 74,9-nik ukioqalertarlutik. Danmarkimi angutit agguaqatigiissillugu 76,8-nik ukioqalertarput, arnallu 81,8-nik ukioqalertarlutik.

Eqqaamassavarput nunatsinni ass. ukiuunerani silami issittumi piniarnermik aalisarnermillu inuusutissarsuteqarneq, aalisakkanik suliffissuarni sulisartuuneq, taamatullu aamma sanasutut sanaartornermilu sulineq suliffinnut nungullarnerpaanut ilaammata. Taamaattumik utoqqalinermit soraarnerussutissiaqalersinnaanermut ukiorititaq eqqarsaatigalugu Danmarkimi aalajangersakkat malinniaannarsinnaanngilagut.

Taamaattumik maanna neriuutigaarput Inatsisartuni partiit amerlanerussuteqartut utoqqalinersiuteqarsinnaanermut ukioritinneqartup ukiunut 66-iniitiinnarneqarnissaannut isumaqatigissagaatigut. Aamma isumaqarpugut inatsimmik allangortitsineq UPA2021-mi



Naalackersuisunit saqqummiunneqarpat tamatumunnga peqatigitillugu allannguutit pineqartut 1. januar 2021-imiit kingumoortumik atuutilersinneqarsinnaanerata aporfissaqanngitsoq.

Namminersorlutik Oqartussanut allaffissornikkut aningaasatigullu kingunerisassai:

Utoqqalinermi soraarnerussutisiaqarsinnaatitaanermut ukioritinneqartut 66-iutiinnarneqarnerata Nunatta Karsianut ukiumut 35 mio. kr.-inik aningaasartuutaanerunissaa nalilerneqarpoq, taamatullu aamma innuttaasut ukiumikkut ineriartornerat pissutigalugu kisitsisip 2030-mi 50 mio.kr.-inut annertuseriarsimanissaa nalilerneqarluni.

Inuussutissarsiornermut allaffissornikkut aningaasatigullu kingunerisassai: Soqanngilaq.

Innuttaasut allaffissornikkut aningaasatigullu kingunerisassai: Soqanngilaq.